



Na wotzamknjenju twarskich džělow w Budyskim jastwje pódla běchu wčera zapósłanča zwjazkowego sejma Marja Michałkowa (2. wotlěwa), sakski justicny minister Sebastian Gemkow (2. wotprawa) kaž tež zapósłancy Sakskeho krajneho sejma Alojs Mikławš (naprawo) a Marko Šiman (srjedža) a Martin Modschiedler (nalěwo, wšitcy CDU). Foto: SN/Maćij Bulank

## Twarjeni a murja ponowjene

### Wjacore naprawy w Budyskim jastwje wotzamknjene

**Budyšin** (SN/MWj). Sakski minister za justicu Sebastian Gemkow (CDU) přepoda wčera w Budyskim jastwje ponowjenej jastwowej twarjeni a ponowjenju murju. W domje 1 stej nětko wuchodny a zapadny džěl saněrowanej. Tež přetwar domu 2 za škitnu jatbu (Sicherheitsverwahrung) je wotzamknjeny. Za tele naprawy su dohromady 37,2 milionaj euro wudali. Cyłkownje je Sakska wot lěta 1991 něhdže 100 milionow euro do Budyskeho jastwa inwestowała. „Twardske wuměnjena moderneho jastwa maja na jednym boku wšitkim wěstotnym žadanjam wotpowědować, na tamnym boku

pak tež jatych motiwować swoje žiwjenje změnić. Ze zakónčenjom twarskich džělow wotpowěduje Budyske jastwo nětko modernemu a humanemu zarjadnišću“, rjekny Sebastian Gemkow.

W domje 1 su nutřkownu strukturu wuchodneho a zapadneho džěla wobsěrnje změnili. Na pjec poschodach nastaj 284 celow, předewšěm jednowosobowe. Nimo toho wutworichu stacije za hladanje a za bydlenke skupiny kaž tež za wólnočasny poskitk. Cela we wuchodnym džělu, hdžež bě Ernst Thälmann 1943/1944 zajaty, wosta jako swědk stawiznow jastwa njezměnjena.

Dokelž je Budyske jastwo wot lěta 2013 tež za škitnu jatbu přislušne, su dom 2 wobsěrnje přetwarili. W nim su nětko bydlenke wobłuki ze 40 stwami za muškich škitnych jatych.

Murja wokoło jastwa njewotpowědowaše hižo džensnišim wěstotnym žadanjam a je nětko nimale dospołnje nowa. Jeničce 90 metrov dolhi wotrězk su twarskokonstruktivnych a pomnikoškitnych přičin dla saněrowali. Dohromady je murja jastwa 1444 metrov dolha a šěšć metrov wysoka. Budyske jastwo ma džensa 414 městnow za jatych, kotřiž su tu jenož něšto dnjow abo na čas žiwjenja.